

Silat ke Olimpik?

23 AUG 1987

Berita Minggu

USAHA menjadikan silat olahraga sebagai salah satu acara di Sukan Olimpik bukan sesuatu yang mustahil andainya apa yang diusahakan secara gigih sekarang berhasil.

Silat olahraga telahpun diterima buat pertama kalinya ke dalam Sukan SEA yang akan diadakan di Jakarta September ini.

Dan jika lebih banyak negara menerimanya sebagai salah satu sukan, tidak ada sebab langkah berikut untuk menjadikan silat olahraga satu jenis pertandingan dalam Sukan Asia pula tidak diterima.

Pada masa ini negara-negara ASEAN sendiri seperti Malaysia, Indonesia, Brunei Darussalam, Singapura dan Thailand telahpun menyertai secara cergas silat olahraga.

Malah, Filipina juga sudah mula menggalakkan silat sebagai salah satu jenis sukan.

Ketika ini acara tersebut telahpun menjadi satu kegemaran di kalangan orang-orang bahagian selatan dan tengah negara itu.

Perkembangan seni silat tidak saja berlaku dengan sihatnya di daerah dunia sebelah sini, malah juga di kalangan setengah-setengah peminat seni pertahanan diri di Korea Selatan dan Jepun.



● HAJI RAHIM DAYAN
Pengerusi Persisi.

tan dan Jepun.

Begitu juga apabila Persatuan Silat Antarabangsa atau ringkasnya Persilat mengadakan satu pertandingan di Austria baru-baru ini banyak negara Barat yang telah menghantar pesertanya untuk mengambil bahagian.

Misalnya Belanda, Jerman Barat, Britain, Yugoslavia di samping Austria sendiri turut serta.

Amerika Syarikat dan Turkey juga khabarnya telahpun mempunyai pasukan-pasukan silat sendiri untuk dikirimkan ke pertandingan-pertandingan antarabangsa.

Pengerusi Persisi, Haji Rahim Dayan, semasa mengulas perkembangan seni silat ini berkata bahawa melihat dari perkembangannya tidak syak "ia sedang berlaku dengan sihat."

Negara-negara anggota Persilat terutama sekali Indonesia telah melancarkan rancangan yang cergas untuk menggalakkan perkembangan silat olahraga di negara-negara Eropah dan Barat.

Jika rancangan ini digalakkan lagi di kalangan lain-lain negara, tentulah perkembangannya lebih pantas lagi.

Penggalakkan itu, kata beliau boleh dibuat melalui demonstrasi, menganjurkan kelas-kelas silat dan juga pertandingan-pertandingan di peringkat antarabangsa.

"Sekarang ia telahpun diterima ke dalam Sukan SEA, mungkin dalam masa yang tidak lama lagi akan dapat kita lihat ia sebagai satu pertandingan di peringkat Sukan Asia dan mudah-mudahan di Sukan Olimpik satu hari nanti."

UNTUK MEMBIAYAI TAMBANG ENAM PEGAWAI

Pesaka masih berusaha dapatkan penaja

26 AUG 1987

PERSEKUTUAN Silat Kebangsaan Malaysia (PESAKA) terpaksa mencari sumber kewangan lain bagi menghantar enam pegawai dalam skuad silat negara ke Sukan SEA bulan depan.

Tindakan ini diambil apabila Majlis Olimpik Malaysia (MOM) enggan membiayai perbelanjaan pegawai-pegawai itu.

MOM setakat ini hanya bersetuju membiayai seorang pengurus pasukan, dua jurulatih, seorang pengadil dan 10 peserta dalam skuad silat negara.

Empat wasit, seorang ahli Dewan Pendekar dan seorang ahli Dewan Hakim bagi mengadili acara Silat Olahraga yang diminta oleh penganjur perlu dibiayai sepenuhnya oleh PESAKA.

Oleh MOHD AZMI RAFI

KA.

Menurut setiausaha PESAKA, Rahman Hassan, walaupun PESAKA ketika ini sedang berhadapan dengan masalah kewangan pertubuhan itu bertekad untuk menghantar pegawai-pegawai yang diperlukan.

"Usaha-usaha sedang giat dilakukan untuk mendapatkan sumber kewangan bagi membiayai perbelanjaan mereka," ujarnya lagi.

Pegawai-pegawai ini diperlukan dalam skuad negara apabila pihak penganjur Sukan SEA di Jakarta menerima cadangan PESAKA supaya pengadil daripada negara-negara peserta turut terbahit dalam mengadili perlawanan.

"Wasit, ahli Dewan Pendekar dan ahli Dewan Hakim kami perlukan untuk memastikan kelancaran ketika pertandingan dijalankan nanti," tegas Rahman.

Menurut beliau, Dewan Pendekar yang terdiri daripada seorang mahaguru silat akan bertindak sebagai pengadil yang memastikan ilmu kebatinan tidak digunakan ketika pertandingan sedang berjalan.

"Sekiranya amalan kebatinan digunakan dalam gelanggang, pertandingan itu akan dibatalkan," ujar Rahman.

Lima wasit yang akan menyertai skuad negara ialah Ahmadi Yahya, Wan Jaafar Wan Jamil, Yusof Darus, Alias Abu Samah dan Samsu Kamal Haji Mohd.



■ A RAHMAN HASSAN

Sementara itu PESAKA bersetuju menghantar jaguh silat negara, Haji Sutin Ali daripada Perguruan Gayong Malaysia untuk menganggotai Dewan Pendekar dan Mohd Sani Murni bagi Dewan Hakim.

Wasit, ahli Dewan Pendekar dan ahli Dewan Hakim sebelum ini telah menghadiri kursus dan taklimat pengadil di Jakarta Julai lepas.